



KENYATAAN MEDIA

KEMENTERIAN EKONOMI
JABATAN PERANGKAAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

SOROTAN STATISTIK EKONOMI MALAYSIA, SIRI 5/2025

Momentum Ekonomi Berterusan pada Awal 2025 dengan Pertumbuhan KDNK 4.4 Peratus dan Inflasi yang Mereda

PUTRAJAYA, 30 MEI 2025 – Pada hari ini, Jabatan Perangkaan Malaysia (DOSM) mengeluarkan **Sorotan Statistik Ekonomi Malaysia (MESR), Siri 5/2025**. Edisi ini memberi tumpuan kepada statistik terkini yang dikeluarkan pada Mac 2025 dan beberapa statistik akan datang untuk April 2025. Selain itu, edisi ini turut memuatkan artikel tambahan bertajuk "Menelusuri Perkembangan Sektor Perdagangan Borong dan Runcit Malaysia, 1970 – 2022", yang mengupas peralihan negara ke arah ekonomi moden dan berorientasikan penggunaan, mencerminkan perubahan struktur yang dipacu oleh proses urbanisasi, peningkatan pendapatan dan adaptasi teknologi digital.

Persekitaran global kekal tidak menentu susulan pelaksanaan tarif secara menyeluruh oleh Amerika Syarikat pada bulan April, yang mencetuskan pelbagai reaksi balas. Sebagai respons, *International Monetary Fund* (IMF) telah menyemak semula unjuran pertumbuhan global bagi tahun 2025 kepada 2.8 peratus, lebih perlahan berbanding unjuran terdahulu 3.3 peratus dan kekal di bawah purata jangka panjang sebanyak 3.7 peratus.

Dalam persekitaran luaran yang mencabar, Ketua Perangkawan Malaysia, Dato Sri Dr. Mohd Uzir Mahidin menyatakan, "Keluaran Dalam Negeri Kasar (KDNK) Malaysia meningkat 4.4 peratus pada suku pertama tahun 2025, perlahan berbanding pertumbuhan 4.9 peratus yang dicatatkan pada suku sebelumnya. Pertumbuhan ini didorong terutamanya oleh prestasi kukuh dari segi penawaran, yang dipacu oleh sektor Perkhidmatan, diikuti oleh sektor Pembuatan dan Pembinaan. Secara bulanan, ekonomi berkembang 3.5 peratus pada Januari dan 3.6 peratus pada Februari, sebelum meningkat kepada 6.0 peratus pada Mac 2025."

Menunjukkan momentum stabil dalam aktiviti perindustrian, Indeks Pengeluaran Perindustrian (IPP) Malaysia meningkat 3.2 peratus tahun ke tahun pada Mac 2025,

disokong oleh peningkatan pengeluaran dalam sektor Pembuatan dan Perlombongan masing-masing sebanyak 4.0 peratus dan 1.9 peratus. Walau bagaimanapun, sektor Elektrik yang mencatat penyusutan 2.7 peratus, telah memperlahankan prestasi keseluruhan. Secara bulan ke bulan, IPP mencatat kenaikan kukuh 9.3 peratus, mencerminkan pemulihan jangka pendek di peringkat subsektor utama. Pada suku pertama 2025, IPP bertumbuh sederhana pada 2.3 peratus berbanding 3.4 peratus pada suku sebelumnya, diterajui oleh sektor Pembuatan yang berkembang 4.2 peratus.

Melihat secara lebih menyeluruh, sektor Perkhidmatan Malaysia mencatatkan hasil berjumlah RM630.0 bilion pada suku pertama tahun 2025, menunjukkan peningkatan 6.0 peratus tahun ke tahun, dengan Indeks Volum Perkhidmatan meningkat 5.2 peratus kepada 158.3 mata. Dari suku ke suku, kedua-dua hasil dan volum mencatatkan kenaikan sederhana dengan masing-masing meningkat 0.3 peratus dan 0.5 peratus. Segmen Perdagangan Borong dan Runcit, Makanan dan Minuman, serta Penginapan kekal sebagai pemacu utama, menyumbang hasil sebanyak RM475.7 bilion (naik 5.3 peratus) dan peningkatan 4.7 peratus dalam Indeks Volum kepada 157.2 mata.

Dalam iklim ekonomi yang stabil, kadar inflasi Malaysia susut sedikit kepada 1.4 peratus pada Mac 2025 berbanding 1.5 peratus pada Februari, berikutan daripada kenaikan harga yang lebih perlahan dalam kumpulan penjagaan peribadi (3.6%), restoran dan penginapan (2.9%), serta kos berkaitan perumahan (1.9%). Bagi suku pertama, inflasi meningkat 1.5 peratus tahun ke tahun, menurun daripada 1.7 peratus pada suku yang sama tahun 2024, menunjukkan tekanan kos yang sederhana dalam kategori pengguna utama. Dari segi penawaran, Indeks Harga Pengeluar (PPI) merosot 1.9 peratus pada Mac, berbanding kenaikan 0.3 peratus pada Februari. Penurunan ini didorong oleh penyusutan dalam sektor Perlombongan (-15.0%), Pembuatan (-1.8%) serta bekalan Elektrik dan gas (-0.5%). Bagi suku tersebut, PPI jatuh 0.3 peratus, terus mencatatkan trend penurunan dari 0.8 peratus pada suku sebelumnya, menandakan kos input yang lebih sederhana merentasi sektor hulu. Pada April 2025, kadar inflasi Malaysia meningkat kepada 1.4 peratus manakala PPI terus menurun 3.4 peratus.

Sektor perdagangan Malaysia terus mengukuh pada Mac 2025, dengan jumlah perdagangan meningkat 2.2 peratus kepada RM249.9 bilion, menggambarkan keterhubungan ekonomi negara yang berterusan dalam rantai bekalan global meskipun berdepan ketidakpastian pasaran dunia yang berpanjangan. Prestasi eksport kekal kukuh, meningkat 6.8 peratus kepada RM137.3 bilion, disokong oleh permintaan luar yang berterusan terhadap komoditi utama dan barangan pembuatan. Sebaliknya, import mencatat penurunan 2.8 peratus kepada RM112.6 bilion, yang telah menyumbang secara signifikan kepada lebihan dagangan. Hasilnya, lebihan dagangan

melonjak 94.4 peratus tahun ke tahun, mencecah RM24.7 bilion, menandakan pemulihan yang kukuh yang menambahbaik dinamik perdagangan. Melihat kepada perspektif yang lebih luas, jumlah perdagangan bagi suku pertama 2025 meningkat 3.6 peratus, sejajar dengan pertumbuhan eksport 4.4 peratus dan import 2.8 peratus. Kesan kumulatif ini membawa kepada pengembangan lebih dagangan suku tahunan 20.1 peratus, yang telah berkembang kepada RM41.0 bilion, mengukuhkan kedudukan Malaysia sebagai hab perdagangan serantau yang berdaya saing dalam persekitaran perdagangan global yang sentiasa berubah.

Mengulas mengenai prestasi pasaran buruh Malaysia, beliau menyatakan bahawa, "Keadaan pasaran buruh terus bertambah baik pada suku pertama 2025, sekali gus mengukuhkan momentum ekonomi yang stabil. Bilangan guna tenaga meningkat 3.0 peratus tahun ke tahun, menjadikan jumlah pekerja seramai 16.7 juta orang. Nisbah guna tenaga kepada penduduk, yang mencerminkan keupayaan ekonomi untuk menjana pekerjaan, meningkat kepada 68.6 peratus berbanding 68.2 peratus dalam tempoh yang sama tahun lalu. Seiring dengan trend positif ini, kadar pengangguran menurun 0.2 mata peratus kepada 3.1 peratus, menandakan permintaan buruh yang lebih kukuh merentasi sektor utama. Dari segi permintaan buruh pula, trend kekal positif apabila bilangan pekerjaan dalam sektor ekonomi meningkat 1.4 peratus kepada 9.06 juta pekerjaan, berbanding 8.94 juta pekerjaan pada suku pertama 2024."

Dato' Sri Dr. Mohd Uzir Mahidin menekankan bahawa Indeks Pelopor (IP) meningkat 0.6 peratus tahun ke tahun kepada 112.5 mata pada Mac 2025, menunjukkan momentum ekonomi yang berterusan, disokong oleh pertumbuhan kukuh dalam kelulusan projek perumahan (27.8%) dan import semikonduktor (22.3%), walaupun mencatat penurunan kecil secara bulanan 0.04 peratus. Walaupun arah aliran jangka panjang masih berada di bawah ambang 100 mata, indeks ini menunjukkan keadaan asas ekonomi yang stabil. Ini memberi isyarat bahawa ekonomi Malaysia berkemungkinan akan mengekalkan pertumbuhan sederhana, dipacu oleh asas ekonomi yang berdaya tahan serta langkah fiskal yang cekap.

Jabatan Perangkaan Malaysia (DOSM) terus komited dalam menyediakan statistik ekonomi yang berkualiti, tepat pada masanya dan relevan bagi menyokong pembangunan negara. Edisi Khas MESR kini boleh dimuat turun di laman web rasmi DOSM di www.dosm.gov.my.

Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.

Malaysia buat julung kalinya telah menduduki tangga pertama (1) di peringkat global dalam laporan dwi-tahunan Open Data Inventory (ODIN) 2024/25 yang dikeluarkan oleh Open Data Watch (ODW), mengatasi 198 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.


Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik Dunia Keempat akan disambut pada 20 Oktober 2025 dengan tema '*Driving Change with Quality Statistics and Data for Everyone*'.

OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

Dikeluarkan oleh:

PEJABAT KETUA PERANGKAWAN
JABATAN PERANGKAAN MALAYSIA
30 MEI 2025

Lampiran 1: Petunjuk Ekonomi Suku Tahunan




Indeks Volum Perkhidmatan

5.2%
ST1 2025



Indeks Volum Perdagangan Borong & Runcit

4.3%
ST1 2025




Eksport

3.0%
ST1 2025



Import

1.0%
ST1 2025



Indeks Harga Pengguna (IHP)

1.5%
ST1 2025



Indeks Harga Pengeluar (IHPR) Pengeluaran Tempatan

-0.3%
ST1 2025

